

Copij van den brief van Z. Exc. aan de nieuwe kolonellen.

Eersame, wyse, voorsienighe, besunder goede vrinden, wy hebben verstaen by den ghecommitteerde der leden der stadt van Antwerpen tgene by den Breedten Raedt den 19den deser maendt is gehandelt int vernieuwen van vier colonellen binnen der selver stadt ende hoewel wy goedt gevonden hadden dat tselve vertroocken ende vuytgesteld ware geweest tot onser compste binnen derser stadt, volghende onsen voorgaende nschryven ende vensueck, oyck dat wy niet en connen gelooven ende bequaem achten de maniere ende wyse die in dese veranderinghe ghebruyckt is, omme den redenen by ons den vs. ghedeputeerde verclaert, nochtans ten eynde men van deen inconvenient niet en geraecke te vallen in dandere ende om voorder desordre voor te comen soo hebben wy den selven keuse by den leden alsboven gedaen, wel willen approberen, vensueckende daeromme wel instantelyck dat ghy luyden u totten selven dienst ende ampt wilt begeven ende den selven aenveerden ende daer inne te doene alle goedt debvoir ende neersticheyt soo wy ons volcomelyck volghende tgoedt rapport dwelck ons van u luyden nuttheyt ende bequaemheyt is gedaen, ende waer inne wy sunderlinghe syn verblydt geweest ende goedt contentement daer aff hebben ontfanghen des zyn betrouwende ende ons versekerende dat tvs. ampt by u luyden in alle vromicheyt ende getrouwicheyt bedient sal worden, op dwelck vertrouwen wy den Almoghenden bidden voor u lieden, eersa-

me, wyse, voorsienighe goede vrinden te nemen in syne
bewarenisse. Vuyt Amsterdam 28 Martii 1581. U lieder
zeer goede vrindt tot uwen dienst. Guille de Nassau.